

191719

DISSERTATIO MEDICA INAUGURALIS  
DE  
**MORBIS EX MOTU**  
**SANGUINIS CIRCULATORIO**  
**IMMINUTO ORIUNDIS.**

*Quam*

**D E O** summo Motore gubernante

*CONSENSU ATQUE DECRETO*

**GRATIOSISSIMI ATQUE EXCELLENTISSIMI**  
**MEDICORUM ORDINIS**

In Illustri & perantiqua Rauracorum Academia

*Pro Summis in Arte Medica*

Honoribus ac Privilegiis Doctoralibus  
legitimè consequendis

*Eruditorum Examini publicè proponit*

**JOH. MARTINUS MEJER,**  
**SCAPHUS. HELVET.**

*Ad D. 10. Martii 1719.*

In Auditorio Hyberno. H. S.



# VIRIS

NOBILISSIMIS, EXCELLENTISSIMIS,  
EXPERIENTISSIMIS ATQUE  
CLARISSIMIS

DN. JOH. FRIDERICO STOCKARO  
à NEUFORN, Med. Doctori, in Inclytâ Scaphusiensium Civitate Judicii Forensis Prætori Vicario Prudentissimo, & S.R.J. Cursuum publicorum Præfecto Meritissimo, Avunculo suo omni observantia colendo.

DN. LEONHARDO HURTERO, Reip. Scaphusiensis Physico, & variorum S.R.J. Principum Archiatro & Consiliario longè Dignissimo, Cognato atque Patrono suo omni honoris cultu prosequendo.

DN. JOHANNI BURGOWERO, Serenissimæ Principis Buchaviensis Medico Excellentissimo, Præceptori suo atque Patrono pie semper Devenerando.

DOMINIS, PATRONIS & FAUTORIBUS  
SUIS GRATIOSISSIMIS

HASCE STUDIORUM SUORUM PRIMITIAS

*debitâ cum observantiâ*

& omnigenæ felicitatis apprecatione

*submisse dedicat*

A U T O R.





DISSERTATIO INAUGURALIS  
DE  
MORBIS EX MOTU SANGUINIS  
CIRCULATORIO IMMINUTO  
ORIUNDIS.

C A P U T I.

De Motu Circulatorio in genere.



Legantissima illa atque ingenio humano nunquam satis admiranda corporis animalis fabrica, unumquemque sedulum ac curiosum Naturæ spectatorem ad accuratam sui contemplationem meritò ducit. Etenim artificiosa

hæc machina non suarum tantum partium, divina arte constructarum, variatione spectabilis valde est, verum insigni quoque solidorum & fluidorum conspiratione atque proportionem admodum considerata, usque adeò ut Machinæ artificiali comparari non incongruè posse videatur. In solidis quippe spectantur varia instrumentorum genera, funes, vectes, cunei, hypomochlia, trabes, folles, cribra, canales, receptacula, & id genus alia, eleganter adeò constructa, ut in his coërceri atque moveri fluida, misceri denique ac separari, hæc iterum in illa agere juxta leges hydrostaticas & mechanicas possint. Hinc perpetuus in animali corpore, dum vivit, viget motus, ac miro mechanismo fluida in continuo constituta sunt circulo. Quamdiu igitur manet justum inter firma & liquida æquilibrium, tamdiu adest motus, adsunt functiones & circulatio optima; hinc vita sana ac vegeta. Peccante verò illo sive in excessu sive in defectu *Morbum* oriri necesse est, deficiente verò



eodem ac planè desinente, *Mors* sequitur. Morbos verò ex defectu illius motûs circulatorii dependentes specialius tractare cum susceperimus, nostrum erit tentare heic, quid valeant humeri, quid ferre recusent.

Ut itaque clarè atque ordine procedamus, ac hypothesen nostras firmis superstruamus fundamentis, absque verâ status corporis naturalis cognitione illum ab eo recedentem, sive præternaturalem accuratè nos scire atque intelligere non posse credimus. Ergo ante omnia exponendum, in quonam consistat motus sanguinis circulatorius, quidque propriè sit ille.

## DEFINITIO.

Motus sanguinis circulatorius est ejus vi Cordis & Arteriarum per totum corpus distributio, atque per venas ad Cor reductio.

Corpus humanum innumeris per totam sui substantiam penetrari canaliculis, magnitudine, diametro, distantia à Corde mirum variantibus, ac elasticis, quorum omnium principium est Cor, Anatomica doctorum Virorum industria clarè docuit hætenus. Cor verò esse muscolum, structura ipsius atque motus abundè probant, constare porrò fibris musculosis validis, elasticis, nervis copiosis, vasis denique propriis jam diu innotuit: contrahi tandem reciprocè & relaxari idem, hacque actione cruorem expellere, iterumque recipere, innumera experimenta probant satis superque.

Ergo ad Circulum sanguinis clarè intelligendum, necessario requiritur accurata Cordis, ejus vis atque usus demonstratio in sequentibus tradenda. Cum autem humores illi à corde expulsi per totum distribui corpus, atque per canales à corde prodeuntes ad omnes ipsius devehiri partes, indeque revehi ad cor debeant, eorum Canaliculorum quoque naturam explicare juvabit. Denique, ut quomodo omnes ritè peragi functiones in corpore humano queant, intelligamus, Sanguinem ipsum, partes eum constituentes atque motum inquirere necesse erit. Postremò his omnibus ritè perpensis atque consideratis, ad ipsos progrediemur Morbos à motu circulatorio imminuto oriundos.

## C A P U T II.

### De Corde & ejus structura.

#### DEFINITIO.

*Cor est musculus, in medio ferè thorace situs, pericardio inclusus, sanguinem per arterias expellens, per venas advectum recipiens.*

#### PROPOSITIO I.

*Cor dissectum exhibet fibras carnosas, fibras nerveas, vasa duplicis generis, ventriculos, auriculas, valvulas, vasa lymphatica, &c.*

Aperta Thoracis cavitate, atque considerato naturali Cordis situ, illud inter utrumque Pulmonis lobum constitutum pyramidalem obtinere figuram cernitur, cujus apex ad sinistrum inclinare latus Anatomica inspectio, uti aliàs sæpiùs, ita nuperrimè quoque docuit. Cingitur Pericardio è duplici lamellâ composito, quarum exterior à Mediastino producta cingit interiorem, quæ externis vasorum è corde egredientium tunicis originem suam debet. Cor ipsum nihil aliud, quam musculus esse, ocularis inspectio unumquemque facile docet: etenim in aqua tepida maceratum, atque à cruore depuratum constare fibris ejusdem coloris, consistentiæ atque elasticitatis cum fibris cæterorum corporis musculorum deprehenditur. Præterea verò ut specialius Cordis substantiam inquiramus, detractâ ipsius propriâ membranâ illud immediatè cingente, primo omnium fibræ paucæ atque tenues, rectâ viâ à basi ad apicem per exteriora solius cavi dextri ascendentes, atque quatuor ejus ora circulari ductu ambientes observantur. His subjectæ sunt aliæ obliquè à sinistro cordis latere dextrorsum ascendentes. Porro iterum aliæ à dextro cordis latere ad sinistrum spiraliter assurgentes, quæ helicem oppositam cum prioribus formant. Denique utrique communes ventriculo fibræ, æquabili circumductu spirales utrumq; ventriculum simul comprimunt, atque basi apicem adducunt, ubi postremò aliâ fibrarum serie, vario flexu prioribus annexâ, eorum



motus coërcetur atque firmatur. Quæ omnia ab Anatomicis, præcipuè à *Clariff. Bœrhaave* in *Inst. Med.* accuratè describuntur.

Ipsū autem *Cor* insignes cavitates obtinet sive *Ventriculos*, quorum dexter capacitāte sinistrum superat, hic tamen multo crassior est sive parietes multo crassiores obtinet illo. His in basi appenduntur *Auriculæ*, quarum dextra multo major sinistrā observatur, quæ musculi sunt excavati, multisque columnis carnosīs intus exornati, ac duplici fibrarum, contrario decursu in tendines oppositos insertarum, seriè instructi, qui uno tendine *Venæ cavæ* orificio & pulmonalis, altero verò ipsius Cordis basi annexi sunt.

*Cor* è basi sua emittit quatuor maxima vasa, duas nim. *Arterias*, totidemque *Venas*. Illarum altera è sinistro prodit ventriculo, sanguinemque per totum spargit corpus, vocatur *Aorta*: altera verò è dextro Cordis cavo egressa Pulmonibus cruorem advehit, & dicitur *Arteria pulmonalis*. Venarum autem alia omnem totius corporis, excepto Pulmone, sanguinem Cordi reddens *Venæ cavæ* nomine venit; Alia Pulmonis cruorem revehens *Vena pulmonalis* vocari consuevit. *Aorta* dum è Corde egreditur, duas supra valvulas emittit arterias dictas coronarias, quæ copiosa adeò ramificatione totam Cordis substantiam perreptare demonstrata sunt, ut retis instar variis inflexionibus, decussationibus, atque anastomosibus omne cordis permeare punctum videantur, injectiones vasorum Ruyschianæ, ut in omnibus corporis visceribus, ita in hoc quoque copiam talium canaliculorum abundè satis probant. Tandem omnes in venas desinentes cruorem per coronarias Cordi reddunt. Valvulæ quoque in Arteria utraque semilunares, in Venis verò tricuspidales & mitrales, vasa cordis lymphatica, nervi denique ex pari vago cor ingredientēs, ab Anatomicis jam dudum descripti sunt. Hæc de structura & partibus Cordis dicta sint, Videndum nunc restat, quænam sit ejus actio.

## PROPOSITIO II.

*Cordis fibræ supra (Prop. I.) demonstratæ ab influxu liquidi nervosi inflantur, distenduntur, hincq; accurtantur, latera cordis pro-*

*propius ad se invicem accedunt subito, hinc cruorem expellunt, quæ actio dicitur Systole: Postea fibræ desinente impulsu sese restituunt in pristinum statum, laxantur, hincq; sanguinem à venis recipiunt, dicitur Diastole.*

Omnis musculi motus, ligato ipsius nervo, cessat statim; Par vagum in cervice ligatum vel abscissum facit motum cordis languere, palpitare cum summo animalis angore, ac plane cessare brevi, teste *Bærbæave*. Hinc à nervis dependere motum musculorum clarè patet. Motus verò cordis & auricularum subitaneus docet, subito quoque repleri fibras cavas, elasticas, adeoque diametros earum augeri, longitudinem imminui, hincque etiam Cor brevius reddi, latera ventriculorum ad se invicem & basin ad apicem propius compelli, ingenti vi superare resistantiam contenti liquidi, adeoque illud quâ datâ portâ expellere. Subito autem hic influxus iterum cessat, adeoque fibræ elasticæ naturalem sibi occupant statum, & cum longitudo earum redeat, cava cordis capacitate augeantur, cruorem per venas allatum recipere necesse habent.

### PROPOSITIO III.

*In Arteriis binis à corde egredientibus, valvulæ semilunares sive sigmoideæ impediunt refluxum sanguinis in Cor. In Venis verò triangulares & mitrales effluxum sanguini allato præcludunt.*

Licet omnia in Corde tanto constructa sint artificio, ut magna fibrarum, ex quibus componitur, vis, tantam superare resistantiam possit, sanguinemque cum impetu expellere; frustraneus tamen esset omnis ille Organismus atque mechanica constructio, circulusque sanguinis procedere justè nullatenus posset, nisi ad Cordis portas Valvulæ à Natura essent positæ. Nimirum in Arteriis talis est Vulvularum conformatio, ut ab apice ad basin ex ipsa arteriarum substantia ascendant, hincq; non minore ac ipsæ arteriæ elasticitate gaudeant, seque in extremitatibus arcuum arcè adeo contingant, ut spatium intermedium vix detur; Hinc tres formant cavitates versus arterias apertas, versus Cor autem clausas. Itaque cum Cor in actione existit, suamque systolem, eo quo solet impetu, exercet, sanguis magna vi expulsus Valvulas arteriarum lateribus ad-



jungit, adeoque liberum sibi exitum parat : desinente verò systole, ac relaxatis ventriculis, in Cor regurgitare nitens sanguis intra valvulas sese insinuando eas distendit, adeò ut earum latera contingere se, sanguinem repellere in arterias possint. E contrario Valvulæ triangulares atque mitrales, similiter à venarum origine prodeuntes, membranamque validam constituentes, pluribus filamentis atque columnis carneis alligantur, oppositis ventriculorum parietibus, adeoque adveniente sanguine atque ventriculos dilatante, funiculi valvularum simul tracti valvulas ipsas post se trahunt, ita ut sanguini per venas advecto in diastole liber pateat aditus ad Cor. In systole verò, quando interni ventriculorum parietes uniuntur, illi funiculi necessariò laxantur, ac membranæ triangulares uniuntur, & cum unitæ aream orificiorum rotundam longè superent, exactè foramen claudunt, adeò ut sanguis intra Cor compressus atque exitum quærens, ad Arteriarum orificia tendere, atque ibidem ejici necesse habeat. Et hæc de Corde ; ut ad *Vasa* transgrediamur, instituti ratio postulat.

### C A P U T III.

## De Arteriis & Venis.

### DEFINITIONES.

1. *Arteriæ sunt canales conici, elastici, ramosi, sanguinem ad omne corporis punctum deferentes, & quamdiu vita durat, pulsantes.*
2. *Venæ sunt canales conici, non adeò elastici, neque pulsantes, sanguinem ab omni corporis puncto ad Cor revehentes.*
3. *Canales conici sunt tubi, ex membranâ è plurimis minoribus vasculis fibrisque compositâ, in cavum conicum convoluti.*
4. *Elasticum autem corpus est, quod magis solito extensum, vel alio modo in situ suo mutatum, in naturalem sibi statum redire nititur.*



# PROPOSITIO IV.

*Omnes totius corporis Arteriæ, exceptis Pulmonalibus, oriuntur ab Aorta, indeq; in totum corpus disperguntur, tandem in vascula incredibilis parvitatatis dividuntur, quorum tamen orificiorum summa longè superat orificium Aortæ.*

Distributionem vasorum fusiozem dare, & unumquemque Aortæ ramum describere, cum hæc neminem, qui nobilissimum Anatomix studium vel obiter inspexit, latere possint, planè esset actum agere. Intimiores autem vasculorum minimorum indagations quo cum successu instituerint Celebrissimi Viri *Malpighius, Ruyschius, Leeuwenhæckius* & alii, eorum fama in sempiternam orbis memoriam sparsa, luculentissimè testatur. Adeò enim dividi Arteriarum ramos, ramorumque ramusculos, ut tandem nil nisi rete, mirabili admodum spectaculo, formare deprehendantur, injectiones *Ruyschianæ* in omnibus corporis visceribus institutæ, & per plures jam annos tanquam immortale industriæ monumentum asservatæ, docere possunt. Oculatissimus ille arcanorum Naturæ scrutator *Leeuwenhæckius* adeò minutos vidit per microscopia canaliculos, ut à diametro unius capilli capitis 500 vicibus superari diametrum minimæ arteriolæ deprehenderit. Imò eousque indefessus ille atque curiosus senex decrescere tubulos illos didicit, ut  $\frac{1}{18000000}$  pars grani sabuli majore diametro gaudeat, quàm tale vasculum minimum vel, uti *Clariss. noster Burgoverus, Serenissimæ Principissæ Buchavien-sis Medicus ordinarius, ac Præceptor meus omni officio colendus,* in sua *Dissert. Inaug.* ipsius *Leeuwenhockii*, quem videre sæpiùs, ejusque varias demonstrationes inspicere ipsi licuit, calculum refert, minimum corporis nostri vasculum nondum æquari

$\frac{1}{18399744000}$  parti grani tubuli æqualis  $\frac{1}{30}$  pollicis parti. Ergo totidem vascula simul sumpta nondum complent superficiem  $\frac{1}{30}$  partis pollicis. Supponamus tamen  $18399744000 = \frac{1}{30}$  parti pollicis, orificium vero Aortæ = uni pollicis quadrato, tunc ritè comparatis omnibus inde deducimus 183 695 211 338 982 400 000 000 vasculorum simul sum-  
torum



torum orificia = orificio Aortæ. Jam si teste Cl. *Bærhæve* in unius communis grani sabuli spatio 125000 vascula hiare deprehendit *Leeuwenhoekius*, accuratiùs attendenti facilè patebit, à summa orificiorum omnium minimorum canaliculorum longè superari orificium Aortæ.

## PROPOSITIO V.

*Unaquæq; autem Arteriola tandem desinit in Venulam; pleræq; autem, antequam in venas degenerant, aliquid de sanguine secernunt.*

Itaque priusquam ad Venas transeamus, eam paucis attingere canalium sanguivehorum partem, quæ est finis Arteriæ initiumque Venæ, ac ubi secretiones fieri novimus, licet per totum vasorum tractum lympham quandam subtilem separari credamus, non inutile erit. Per varia proin organa sanguinem varia quoque seponere humorum genera, neminem latere arbitror, in Cerebro nimirum Liquidum nervosum, in Hepate Bilem, Urinam in Renibus, Semen in Testibus, in aliis denique organis alios segregari humores quivis scit. Ut igitur hujus origo differentię pateat, in horum organorum structura accuratiùs examinanda, magnam semper navarunt operam Viri docti. In Corpore quippe humano *Glandulæ* duplicis generis sunt observatæ jam dudum ab Anatomicis, quarum aliæ *conglobatæ* sive *simplices*, aliæ verò, ex plurimis simplicibus *compositæ*, *conglomeratæ* audiunt. Componuntur autem illæ Glandulæ ex membrana fibris variis circularibus, elasticis combinatâ, atque cavum aliquod formante, in quod arteriolas minimas hiare ex una parte, ex altera venas oriri credunt: in his cavernulis aperta esse oscula lateralia diametro admodum varia, arteriolarum diametris tamen minores, sibi persuaferunt. Sanguis itaque vehementi cordis motu atque arteriarum elasticitate propulsus ad minima usque, in glandularum cavis benè præparatus, attritus atque imminutus, exprimitur; In his autem fibrillarum glandulæ vi comprimitur, coërcetur, atque quâ datâ portâ, uti dicunt, exprimitur. Igitur per vasa lateralia, utpote minimâ omnium diametro prædita,



prædita, etiam subtiliorem partem sanguinis secedere, quam pro variâ glandulæ ejusque pororum diametro, varia quoque sortiri nomina credunt. Hisce tamen omnibus nihil consequi mihi videor præter maximas incertitudinum tenebras. Tantis enim premi difficultatibus videtur hæc sententia, non minus atque illa, qua certam unicuique glandulæ pororum figuram affingere student, ut quocunque tandem me vertam, pro certâ veritate nil nisi dubium mihi remaneat. Sive enim pro unoquoque humore secernendo peculiarem aliquam pororum figuram statuere placeat, sive humorum diversitatem à majore vel minore pororum diametro petere velimus, dubii atque incerti manemus. Si prius eligam, tunc necesse esset, ut primò constans semper eadem pori figura maneret, neque ab aliis figuræ particulis mutari posset, quod tamen in mollibus his partibus impossibile; deinde omnes liquoris alicujus particulas ejusdem figuræ esse debere ac magnitudinis sequeretur, quod concipere certè nequeo. Si posterius statuam, tum per maximos poros omnes minoris diametri particulæ secerni, adeoque ex.gr. Bilis, tanquam succus satis crassus, maximâ omnium copiâ, neque tanta simplicitate segregari deberet, in minimis verò nulla penè secretio fieri posset. Itaque eorum sententiæ votum quoque meum dare nullus dubito, qui credunt, à primo creationis & formationis partium momento unamquamque partem ad certum aliquem humorem secernendum esse destinatam, atque eo humore prius adeo imbutam, ut postea nullas amplius nisi ejusdem naturæ particulas transmittat, haud aliter ac in charta emporetica certo humore imbutâ, non alium nisi eundem à reliquis humoribus separare, observamus, si ex.gr. in uno vase Aqua & Oleum confundantur, charta oleo tincta omne oleum ab aqua separabit, in aquam autem immissa eandem relicto oleo è vase segregabit. Suum cuique pulchrum, mihi hæc sententia probabilissima omnium visa est, quæ apud *Bernh. Connor* de secretionem animalium fusiùs reperitur. Secretorum itaque ejusmodi humorum alii intra receptacula sua deponuntur, alii statim ad sua quique loca deferuntur, alii denique extra corpus per minima illa in cute oscula insensibiliter ac perpetim, magnâ copiâ, subtilissimi-



tilissimæ lymphæ formâ ejiciuntur, usque adeò ut *Sanctorius*, quotidie exactè ponderando assumpta & excreta, exhalantium copiam  $\frac{5}{8}$  assumptorum æquare deprehenderit. E. ut Sanguis varii generis particulis constet necesse est. E. requiritur humorum agitatio, attritio, divisio, præparatio, antequam secerni alii ab aliis queant. E. confugere ad peculiarem aliquam pororum figuram, vel ad fictitium aliquod & absurdum fermentum, vanum esse atque inane quis non videt?

Denique omnes Arteriolæ abeunt in Venulas minimas, sanguinem arterioso multo crassiores vehentes, in ramulos, ramosque sensim majores coeuntes, donec tandem ab omni corporis parte, exceptis Pulmonibus, in Venam Cavam conjuncti sanguinem dextro Cordis ventr. infundant omnem. Abdominalium autem Viscerum, uti Ventriculi, Intestinorum, Mesenterii, Omenti, Pancreatis, Lienis, &c. Venæ arteriarum more sanguinem ad Hepar, pro secernenda Bile, prius deferunt, quàm per Venas in Cavam desinentes, unâ cum reliquo cruore suum quoque reddant Cordi.

## PROPOSITIO VI.

*Vasa totius corporis omnia sunt elastica, (Def. 4.) ne minimis quidem exceptis, Arteriæ autem magis quàm Venæ, omnibus tamen proportionata est elasticitas.*

Arterias æquè ac Venas constare 4 tunicis, nimirum exteriore nervosâ, post glandulosâ, hinc musculosâ, ultimâ denique ac intimâ fibris in longum porrectis constante, in Anatomicorum libris fusius legere est. Omnes illæ membranæ innumerarum ac variarum fibrarum serie sunt præditæ, omnes autem fibras esse elasticas multis verborum ambagibus demonstrare supervacaneum planè esset. Itaque maximam Arteriam, utpote maximâ fibrarum copiâ instructam, maximâ quoque gaudere elasticitate credimus; & contrà. Quamdiù verò elastica corpora in naturali suo situ relinquuntur, tamdiù nullam exercere vim possunt. E. requiritur, ut vis inferatur corpori, & quidem talis, quæ resistantiam suo impetu superare valeat. Hisce positis atque intellectis ingentem illam sanguinem propellendi vim percipere difficile non est. Etenim si-  
mul



mul ac musculari Cordis substantiâ (Propos. II.) contractâ cruor in Arterias projicitur, vasa illa conica à suo centro recedere magis, adeoque circulum formare majorem debent: At verò cùm talis ipsis sit violentus situs, magno cum impetu resilire in pristinum locum coguntur. Hæc autem vasorum elasticitas successivè adeo decrescit ad minima usque, ut, licet in iis minimus sit elater, tandem certa quædam proportio sit inter ramum & suum truncum: Arteriam enim, quæ duplo vel triplo pluribus instructa est fibris, quàm ejus ramus, duplo quoque vel triplo majorem exercere vim posse judicandum est. E. talis rami elasticitas ad elasticitatem trunci est ut ejus diameter ad trunci diametrum. E. Aortæ elasticitas ad minimæ corporis Arteriolæ elasticitatem sese habet ut ejus diameter ad hujus diametrum. Venæ autem, cùm tenuioribus multo constare tunicis deprehendantur, minore quoque elatere pollent. Cæterum, quæ de ejus proportionem apud Arterias dicta sunt, ea huc quoque referri posse merito censemus.

Inspectis itaque breviter Cordis vasorumque ejus proprietatibus, ut inquiramus quoque in illud, quod per ea movetur ac fluit, instituti nostri ratio requirit.

## C A P U T IV.

### De Sanguine.

#### D E F I N I T I O.

*Sanguis est illud corporis nostri fluidum, rubrum, quod, dum vivit illud, per descripta vasa (Cap. præced.) circulatur.*

#### PROPOSITIO VII.

*Microscopio conspectus Sanguis constat globulis innumeris æsero limpidis. Chemico autem examine subjectum aquam, Evol. Scum, & Qm exhibere dicunt.*

Magnus ille minimorum illustrator *Leeuwenhæckius* Sanguinem continere globulos rubros è minoribus conjunctis

constantes, ac sero pellucido innatantes, per microscopia observavit. Eosdem & mihi quoque aliquoties videre contigit ope microscopiorum *Nobilissimi* ac *Doctissimi* nostri *Peyeri*, Amici mei valdè dilecti : in tubulo nimirum vitreo receptus Sanguis recens ex vulnere digiti profluens, continebat globulos suos & lympham dictam, adeo ut globulos omnes fundum petere, lympham autem supernatare viderimus. Globuli verò minores majorem constituentes, quo propius ad invicem accedebant, eò rubicundior apparebat sanguinis color, discedentibus illis pellucidior reddebatur. E. subtilior Sanguinis pars continetur in lymphâ superiorem tubuli partem occupante, crassior verò in globulis inferiora petentibus. E. non incongruè rubri in Sanguine coloris causa à conjunctione globulorum minorum deducitur. Quibus Chemica indagatio magis arridet, ii in destillatione Sanguinis ascendere primò lympham dicunt, post oleum, hinc  $\ominus$ vol. tandem in fundo relictam esse partem terrestrem. Verùm cum de Experimentis chemicis, gloriari multum nequeam, ulteriore inquisitione lubens supersedeo.

## PROPOSITIO VIII.

*Partes Sanguinis, ut transire per minima, atq. secretiones subire possint, debent esse proportionatæ suis canaliculis & poris.*

Ex dictis (*Prop. IV.*) patet, quanta sit minimarum arteriolarum subtilitas & exilitas, adeo ut ad incredibilem ferè parvitatem dividantur atque decrescant. Omnes tamen aliquod vehere fluidum & ratio & experientia dictitant: hanc confirmat incomparabilis industria *Ruysschii* & *Leeuwenhæckii*; illa quemvis vel ex eo docere idem potest, quod Sanguinem per arterias distributum per minimos canaliculos, visus nudi hebetudinem longè superantes, fluere in venas, per has autem ad Cor reverti sciamus. Ut igitur in motu continuo constitutæ Sanguinis moleculæ ad omne corporis punctum penetrare, minimaque permeare vascula possint, earum diametri debent saltem esse minores, quàm sunt diametri vasculorum.

Ponamus autem ex datis *Leeuwenhæckii* diametrum unius Capilli capitis 500 vicibus superare diametrum minimæ Arteriolæ



teriolæ fluidum adhuc rubrum vehentis ; igitur diameter globuli unius rubri debet esse minor adhuc quàm  $\frac{1}{500}$  pars diametri Capilli capitis, si enim major esset vel æqualis, ut quiesceret in tubulo Sanguinis particula, obstructionem atque stagnationem produceret necesse esset : globuli autem rubri quamdiu juncti manent, tamdiu fore rubrum illum humorem jam (Prop. præced.) diximus ; simul ac verò separantur ab invicem, tunc unâ cum parte serosâ in lymphatica vel alia secretoria vasa secerni facile, adeoque cum colore sanguinis quoque nomen amittere posse credo. E. hinc Natura sanguinis, ut per minima ire vasa possit, scitur, reliqua quæ de Sanguine dicenda veniunt, in Capite sequenti prosequi constituimus.

## C A P U T V.

### De Motu Sanguinis circulatorio.

#### PROPOSITIO IX.

*Cor est primaria & præcipua Motûs circulatorii sanguinis causa.*

Ex descriptâ hætenus Cordis & Vasorum fabricâ non obscure, credo, patebit, Motum sanguinis circulatorium dependere ab ipso Corde, quod valido fibrarum suarum apparatu (Prop. II.) tantum communicare sanguini motum potest, ut ad ultimas usque arteriolas, venasque ipsas propagetur. Itaque nostrum erit breviter describere, qua ratione motum illum fieri ac propagari credamus, quâ in re instar omnium nobis est *Clariss. Bærhæave*, cujus ipsissima verba apponere non dubito ; ita enim ille : 1. *Ambo sinus venosi simul implentur, turgent.* 2. *Ambæ auriculæ simul flaccescunt.* 3. *Tum implentur eo ipso momento cruore actô per vim contractilem musculosi sinus venosi proximi.* 4. *Eo ipso puncto temporis Cor utrumq; simul contrahit se, evacuatur cruor, implentur Arteriæ duæ magnæ & dilatantur.* 5. *Momento post hanc constrictionem Cor utrumq; inane jam flaccescit, elongatur, capacitate augetur.* 6. *Quo vix dum contingente utraq; Auricula motu musculari contrahit se, cruorem*

*contentum exprimit, inq̄ cava Cordis propellit. 7. Iterum interim replentur sinus venosi, ut in phænomeno primo, atq̄ eadem ordinis serie omnia redeunt, atque perdurant, donec languet propinquum morti animal. Ex quibus clarè, opinor, liquet, motum Cordis ordinatum, reliquis benè constitutis, producere quoque sanguinis motum ordinatum. E. propositio vera est.*

## PROPOSITIO X.

*Cordis ingens vis ex resistentiis, quas superare debet, aestimari quodammodo potest.*

Acutissimus Borellus in *Tractatu de Motu Animalium*, demonstrationibus suis probat, Cor majorem superare resistentiam debere, quàm pondus 135000 librarum, quod fusius apud ipsum Authorem legere quivis potest. Sufficiat nobis demonstrasse, maximas saltem vinci à Corde resistentias. Cor nimirum unoquoque minuto absolvere circiter 60 pulsationes, experimenta docent plurima, E. in unaquaque hora 3600 pulsus numerantur. In quavis autem pulsatione duæ ad minimum uncia expelluntur in Arterias, cruore jam turgidas, non tamen adeò extensas, ut dilatari amplius nequeant, verùm circumquaque pressas à circumjacentibus musculis validis, membranis, visceribus &c. Dein auctâ jam sanguinis per accessionem 3ij copia in Arterias propelli prior ulterius per totum arteriarum tractum debet. Porrò quoniam vasa sunt conica, hincque semper angustiora (*Prop. præced.*) in omni puncto resistere, ex Hydraulicis docemur. Tandem plurimas Arteriarum curvaturas, varias divisiones, anastomoses &c. resistentias augere mirum in modum posse, nemo, opinor, non videt. Igitur has omnes superare resistentias Cor debet. E. magna ejus vis.

## PROPOSITIO XI.

*Sanguis duplicem patitur vim, nimirum à Corde & Arteriis, adeoq̄ ejus circulus promovetur etiam ab arteriarum elasticitate, & venarum valvulis.*

Contractâ validè admodum Cordis substantiâ Sanguis magno cum impetu projicitur in Arterias (*Prop. præced.*)  
ita



ita ut Vasa hæc cedere aliquatenus Cordis vi cogantur, adeoque accedente novo è Corde Sanguine hujus copia in arteriis augeri, sicque Arterias in majorem diametrum extendi diximus supra (*Propos. VI.*) Ex demonstratâ itaque per eandem Propositionem Arteriarum elasticitate, ac validâ resistendi vi clarè patet, fibras earum è statu & situ naturali remotas, eadem virtute, quâ fuerunt extensæ, sese restituere niti, hincque vim inferendo sanguini intra vasa coërcito, illum pellere versus eam partem, ubi minor erit resistantia. Canales conici variè divisi atque inflexi, semper angustiores, sectionibus transversis minores exhibent circulos versus extremitates, via igitur angustior, E. ibi resistantia major. Non autem divisi, neque minores, sed semper majores versus Cor, hinc via magis patula, E. resistantia minor. E. deberet vi Arteriarum validâ ad Cor repelli cruor. E. nullus circulus foret, nisi provida Natura valvulas ad ostia vasorum posuisset. Itaque sanguini ad Cor præcluditur aditus, adeo ut ad Arteriarum divisiones, urgente harum vi, protrudi cruor pressus, ac exitum quærere necesse habeat. E. duplicem patitur vim Sanguis. E. Systole Cordis Diastole Arteriarum synchrona, & vice versa. Denique per minima jamjam delatus Sanguis, ac Venis traditus, ut supra (*Propos. V.*) docemur, partim vi motûs jam accepti à Corde & Arteriis, partim elasticâ Venarum virtute adeo fertur versus Cor, ut ei quidem aditus in illud pateat, refluxus autem in Venas à valvulis impediatur.

## PROPOSITIO XII.

*In Arteriis maximis cursus velocitas est maxima, in minoribus minor, in ultimis tandem omnium minima; adeoque velocitas in minimis vasis ad velocitatem sanguinis majorum vasorum se habet ut eorum orificia simul sumta, h. e. quantum orificia minimorum simul sumta superant orificia majorum, tantum velocitas illius minor erit velocitate hujus.*

Ex *Leeuwenhæckii* demonstratis supra (*Prop. IV.*) probavimus, summam orificiorum minimorum canalium longè superare

rare orificium Arteriæ magnæ. Ponamus verò, eandem liquoris copiam ex uno vase per unum canalem, eodem temporis spatio, effluere debere cum eadem quantitate ex alio vase per duos canales, quorum uterq; sit ejusdem cum priore diametri. E. ut eadem quantitas per priorem canalem effluere possit, quæ profuit ex alio vase per duos canales, necessariò eo velocius fluere debet, quo minor est ejus diameter duobus posterioribus simul sumtis; adeoque duplo velocius prorumpere debet ille liquor, quàm posterior. E. velocitas prioris ad posterioris velocitatem erit ut 2 ad 1. Si igitur ritè perpendamus, summam minimorum canalium orificiorum majorem esse orificio Aortæ, concludere non erit difficile, velocitatem motûs Sanguinis minimarum arteriolarum ad velocitatem ejus, qui movetur per Aortam, eandem rationem habere ac summa orificiorum ad orificium Aortæ. Crescente autem Arteriarum divisione, quo longius illæ à Corde recedunt, eo magis debilitetur paulatim motus, ac cum augmento divisionum imminuatur necesse est, usque adeo ut *Clariss. Keil.* velocitatem sanguinis in aorta ad velocitatem in quibusdam arteriolis, factâ supputatione, deprehenderit se habere ut 5233 ad 1.

### PROPOSITIO XIII.

*Hic (Prop. præced.) sanguinis motus necessarius est ad conservandum in toto corpore calorem moderatum & æqualem.*

Aqua eodem ignis gradu ebullit tandem. Axes currum eadem velocitate per aliquod tempus progedientium ignem concipere videmus. Neque difficile est intelligere, corpus semel motum, facile à levi causâ prosequi eundem posse. Quo diutius autem motus durat, eo magis increscit calor. Sanguis vehementi admodum vi (*Prop. X.*) è Corde expulsus motum suum toti massæ sanguinæ communicat ad omnes usque extremitates. Verùm quoniam tum à maximis resistentiis (*Prop. X.*) tum quòd minus sensim sensimque sit coërcitus sanguinis motus (*Prop. præced.*) successivè quoque imminuatur idem necesse est. Cessare tamen planè nequit, sed præsens  
jam



jamjam calor blandus blandiori semper motu usque adeo conservatur, ut licet progressivus motus tardior sensim fiat, intestinus tamen maneat semper, atque particularum motus inter se. Hinc fit ut idem suavis calor observetur in toto corpore, quemadmodum Doctissimi in Arte nostra Viri *Malpighius*, *Borellus*, *Steno*, *Finckius* & alii, in Aula Hetrusca Principis jussu congregati, experimenta in Equorum Corde & Vasis majoribus instituentes, Thermoscopiis eundem ubique calorem deprehenderunt. Si autem motus ille, quem Sanguis ab impetu Cordis concipit, per totum Arteriarum tractum eadem velocitate continuaret, maximus tandem in corpore æstus, ac misera subito mors esset expectanda. E. imminutio velocitatis motus est necessaria.

## PROPOSITIO XIV.

*Circulatio Sanguinis necessaria est ad Animalis conservationem, nutritionem, augmentationem.*

Varios corporis motus, variasque secretiones consumere tandem debere totum corpus, necesse esset, nisi cibo & potu nutritus Sanguis, ac continuè in omnes partes impulsus conservare atque nutrire idem posset. Etenim omnia constant ex minimis arctè sibi invicem connexis fibris, quæ musculorum, vasorum, ipsorumque fluidorum motu atteruntur, repetito sæpius impulsu à toto dissolvuntur, fluido miscentur, auferuntur, tandemque extra corpus avolant. Hoc verò cum fieri indefinenter sciamus, interire denique Animal deberet, nisi restituerentur ablata. Itaque dum particulæ deperditæ relinquunt foraminula vacua, aliis accedentibus & loca illorum occupantibus nutrirî corpus concipiendum est. E. requiritur, ut variis particulis, varios subeundi ac transeundi poros aptis, constet Sanguis. Cum autem vasa liquido turgida ab impulsu ad latera distenduntur, eorum partes discedere à se invicem, novaque formare foraminula, particulis denique advectis introitum concedere debent, quæ tum cæteris junctæ molem corporis successivè augere usque ad certam à Naturâ statutam magnitudinem possunt: sicque crescere & augmentari corpus dicitur. Hæc autem omnia, nisi sæpius repetito

Sanguinis circulo, fieri non posse ipsa ratio & experientia dīctat. Sanguis enim quiescens statim coagulatur in grumos; & hinc motui idoneus amplius non est. E. continuus debet esse motus. Currens verò cruor recipit Chylum per ductum thoracicum accedentem, eumque Cordi affert, hinc toti Massæ sanguineæ commiscetur, circulatur, atteritur, comminuitur, sicq; ad secretionem subeundas aptus redditur. E. maximè necessarius est Sanguinis circulus.

## C A P U T V.

### De Morbis ex Motu Sanguinis circulatorio imminuto dependentibus.

Hiscæ tanquam maximè necessariis & utilibus positæ atque explicatæ; ipsos aggredimur Morbos à Motu (*Cap. præced.*) imminuto ortis. Ex hætenus dictis autem, atque eâ, quâ fieri potuit, brevitate expositis satis constabit unicuique, omnino necessariam esse justam, mediocrem, æquabilem atque per omne corpus factam circulationem ad perfectè sanum corporis statum. Quamprimum verò tardior fieri incipit hic Motus, tunc varii inde *Morbi* oriantur necesse est. E. primo omnium scire convenit, quid imminuere Sanguinis circulum possit, & quid inde sequatur, subjungendum. Itaque de *Causis* primò, postea de *Morbis* agendum.

## PROPOSITIO XV.

*Assumpta, injuriæ aëris, applicata varia, animi affectus, quies, sunt plerumque causæ, quæ Sanguinis Motum circulatorium imminuere possunt.*

*Alimenta* quemadmodum justâ quantitate & qualitate assumpta ad circulum Sanguinis conservandum omne ferunt punctum; ita depravatam eorum usum imminuere quoque eundem posse nemo forsan negabit. Etenim si iis utamur cibis, qui crassâ, durâ, viscidâ, pingui denique naturâ gaudent, non digestio tantum in Ventriculo adeò læditur, ut neque ingente aliàs fibrarum ipsius actione superari, dissolvi, comminui, atque in talem redigi massam queant, quæ in optimum



timum converti Sanguinem apta sit, neque peristaltico Intestinorum motu, per accessionem Bilis & Lymphæ pancreaticæ præparari ita possint, ut satis subacta ejus pars in Vasa lactea propelli queat; sed ejus loco humor viscidus, tenax, & ad fluidum floridumque Sanguinem producendum ineptus planè segregatur, ac talis per ductum thoracicum Chylus ad ipsum Sanguinem defertur. Qualis hinc Massæ sanguineæ constitutio, atque fluiditas oriatur, & an ea velocitate percurrere vasa possit, judicare quivis facile poterit.

*Aër* porrò gelidus, quantum ad iminuendum sanguinis circulum tribuere possint, quotidiana docet experientia: diuturnum enim atque intensum frigus insensissimum sanguinis circulationi esse, multis probare exemplis supervacuum foret, cum calor motus, frigus quietis sit comes ferè individuus. Quapropter exteriora Cutis vascula, tanquam aëri ambienti proxima, ejus quoque injuriis omnium maximè sunt obnoxia, adeò ut, dum constringuntur vascula, cursus liquoris in illis contenti per frigus externum cohiberi facile possit, donec desinente frigore motus pristinus restituatur liquido.

Pressionem quoque Aëris mutari Mercurii in Barometris ascensus atque descensus docet: hinc etiam corpus nostrum nunc majori, nunc minori pondere premitur. Ergo si aëris externi pressio atque vis in corpus est major, resistentia verò aëris interni minor, tunc sine dubio hinc constrictionem vasculorum, & orificiorum cutaneorum transpirationem imminutam sequi debere necesse est. E contrario, ambientis aëris pressione diminutâ, resistere magis Cutis canaliculi atque dilatari possunt.

Præterea columnarum aëris subita mutatio ex altissimis montibus in profundiora loca mutare Sanguinis motum valdè potest. Cum enim ex multis Barometro institutis experimentis innotescat, majore multo pondere Mercurium premi in altum in depressis, quàm in excelsis locis, intelligere non est difficile, cur illi, qui leviori aëri atque sublimioribus locis assueti subito in inferiorem terram transferuntur, tanta subinde mala pati, imò sæpè interire observentur; quorum causa ex prece-



dentibus peti atque intelligi facile potest. Hinc applicata alia externa, Aqua nimirum frigida, aliave corpora adstringentia, nimis constringendo, cutis vascula, sicq; transpirationem impediendo eosdem producere effectus posse haud difficulter patet.

*Affectus* etiam *animi* quantam in corpus nostrum, ejusque sanitatem exerceant saepius vim, plurimi proprio id damno experti sunt. Tristitiæ continuæ deditos omnibus suis functionibus æquè benè atque alacriter defungi, motumque Sanguinis circulatorium eà, quâ deberet, velocitate in eorum corporibus absolvi, concipere nequeo; quin potius tardum succi nervosi in cordis fibras influxum, debiliorem quoque rarioremque pulsum, hinc tardiozem circulum producere crediderim. Sanguinis itaque circulatione impeditâ vel imminutâ, tardius ad organa secretoria defertur idem, tardius, neque debitâ quantitate excernitur, unde non possunt non coacervari humores, inertes fieri, totiusque hinc corporis oriri torpor, ut hinc infinita quoque derivari mala nemo non videat.

Commotiones autem musculorum, variasque corporis agitationes, Sanguinis per vasa decursum atque functionum promovere exercitium posse expertus dicere quivis potest. E contrario inmoderata *Quies* non tantum retardare omnes sanguinis præparationes, sed ipsum quoque ejus cursum vel ideo inminuere solet, quod spirituum in partes defluxum, hincque fibrarum in ingesta & Sanguinem vim debilem planè reddat. Etenim sicuti varia corporis exercitia ad propellendum sanguinem, per reciprocas musculorum contractiones atque relaxationes, conferre multum possunt; ita judicare non est difficile, Sanguinem tali destitutum motu eà quoque rapiditate cursum suum prosequi non posse; hinc tardus ejus ad quasvis partes defluxus necessario sequitur. Etiam hinc minor eorum in contenta vis. Hinc quanta malorum multitudo oriri possit, clarè patet.

Licet verò plurimas adhuc addere causas facile esset, eas tamen omnes ad hæctenus memoratas referri haud difficulter posse credimus.

Expositâ itaque breviter *Causarum* historiâ videndum nobis jam erit, quidnam ex his mali, & quanam inde mortalibus contingere ægitudines atque molestiæ possint. PRO-



## PROPOSITIO XVI.

*Imminutus Sanguinis circulus fibrarum motritium debilem reddit tonum, hinc tollit æquilibrium inter solida seu vasa atque fluida.*

Hoc itaque modo (*Propos. præced.*) vel depravatâ Sanguinis naturâ atque consistentiâ, vel transpiratione insensibili præpeditâ, vel denique liquido nervoso non justâ quantitate ad fibras determinato, copia cruoris in toto corpore augeri, turgere vasa, latera eorum distendi, atque ad majorem solito diametrum extendi, hinc suâ resistentiâ vim solidorum eludere atque superare posse nemo inficias ibit. Igitur Sanguis debitâ velocitate absolvere circulum suum nequit. Notum enim ex antecedentibus est, quanta sit virium solidorum in fluida necessitas, adeò ut simul ac eorum tonus atque robur aliquid patitur detrimenti, sanguinis quoque in omnes partes propulsus supprimi aliquo modo cogatur. Motum enim sanguinis à vasorum vi augeri multum ex dictis (*Propos. XI.*) patet. Fibras autem nimia extensione debiliores reddi experientia testis est. Ergo hinc earum tonus imminuitur, atque æquilibrium in fluida horumque canales tollitur.

## PROPOSITIO XVII.

*Sublato æquilibrio (Prop. præced.) Cor & vasa in propellendo, atterendo atq; dividendo cruore officium suum rectè præstare nequeunt; hinc Sanguis manet crassus, crudus, viscidus, neque ad secretionem subeundas aptus; unde Obstructio.*

Valida, atque vehemens Cordis vis (*Prop. II.*) vasorumque elasticus in cruorem impetus (*Prop. VI.*) non solum progressivum Sanguinis motum conservare, sed & summè necessariam ejusdem humoris præparationem in toto canalium tractu juvare mirum potest. Velociter enim protrusus è Corde Sanguis magnâ vi in latera vasorum impellitur, ab his verò eadem virtute repellitur, ruunt hinc contra se invicem validè admodum ejusdem particulæ, miscentur, atteruntur, dividuntur, usque adeo ut ad Organa secretoria delatus cruor ita sit in statu naturali dispositus ac elaboratus, ut quodque Organum



peculiarem suum humorem à totâ separare Massa sanguineâ faciliè queat. Verùm si nimis vel copioso vel crasso sanguine turgida in toto corpore Vasa adeò extendantur, ut debilia sic reddita nisus exercere sufficientes in liquores nequeant, hincque vis talium vasculorum à resistantia sanguinis superari quodammodo valeat, quid inde judicare aliud licet, quàm non sufficienter misceri, atteri, dividi, atque adeò disponi Sanguinem posse, ut per minima dein fluere Vasa commodè, secretionisque obire suas aptus sit? Hinc fit, ut in exilissimis canaliculis hærare nimis crassæ Sanguinis particulæ teneantur, unde Vasa obstruuntur, quiescit ibi locorum Sanguis, ac infinità tunc generare mala facile potest.

### PROPOSITIO XVIII.

*Obstructio (Propos. præced.) si fiat demum in Vasculis lymphaticis, variæ Hydropis species oriuntur.*

Si Sanguis ob defectum motûs nimis est viscidus, Lympha quoque in vasa lymphatica ejecta erit viscida, adeoque ad motum citatum inepta, hinc inde quiescit paulatim, stagnat, distendit vascula mollia, tumefacit corpus, ut *Oedematoso Tumore* corripiatur totum. Si verò tale phænomenon contingat in quadam parte in specie, ubi angustiora forsan, mollia nimis, atque debilia existunt vascula lymphatica, adeo ut dilatari à congregatâ, & tardiore motu progrediente Lymphâ possint, rumpi tandem illi canaliculi, extravasari atque effluere serum, cumulari intra partium membranas, indeque *Hydrops particularis* generari debet, pro varietate partis laborantis, variis insigniri nominibus solita. Ita ex Lymphâ effusâ in Caput, atque ibi collectâ, *Hydrocephalo* laborare hominem dicimus. Si verò in pectore accumuletur feri ingens copia, *Hydrops Pectoris* vocatur, in Abdomine, *Ascites* appellatur, in aliis alia nomina sortitur, quarum omnium specierum fusiori tractationi incumbere heic, ne Dissertationis limites transgrediamur, instituti nostri non est.

### PROPOSITIO XIX.

*Si obstructio contingat in minimis Arteriis, ibi Sanguinis quantitas à succedente novo augetur, extenduntur vascula, nexus solvitur, ac fit Hæmorrhagia.*

Quo



Quo minores sunt canales, eo sunt tenuiores, paucioribus fibris instructi, debiliores hinc ac minus fortiter resistentes. Ergo Sanguini copioso, simulque viscido tardeque fluenti, resistere proportionata vi nequeunt, ita ut ab his debilius semper propulsus in extremis canaliculorum angustiiis quiescere tandem possit. Quovis interim Cordis pulsu nova Sanguinis pars jam quiescenti additur, hinc ejus copia augetur successivè, vasa dilatantur ad majorem diametrum, fibræ ab invicem recedunt, hinc solutio unitatis & vasculorum *εἰς*, *διαπύθωσις*, aut *διαίρεσις*, cum subsequenti *Hæmorrhagiâ*. Ubi igitur vascula sunt tenuiora, ibi talia facillimè contingere mala necessum est. Ita omnes *Hæmorrhagiæ* species spontaneas referre huc possumus, uti sunt *Hæmorrhagia Narium*, *Uteri*, *Hæmoptysis*, *Fluxus Hæmorrhoidum*, &c. Ipsam quoque *Apoplexiam* à rupturâ vasculorum Cerebri minimorum ortam sæpius notârunt Practici: effusus enim magnâ copiâ Sanguis tubulos Cerebri nervosos subito comprimit, spirituum defluxum in omnes partes impedit, atque adeo sensu motuque totum corpus privat.

## PROPOSITIO XX.

*Si Cruor in minimis canaliculis adeo stagnat, ut tamen non crepent statim vascula, oritur Rubor, Tumor, Abscessus, Inflammatio, Gangræna, Sphacelus, & infinita mala.*

Ex demonstratis (*Prop. præc.*) novimus, accumulâtâ sanguinis copiâ extendi tubulos arteriosos, fibrasque à contactu mutuo discedere. Si autem non planè separantur ab invicem fibrillæ, sed ad eam tamen tenuitatem tendantur, ut pellucidæ fiant membranæ, à rubedine Sanguinis contenti tota, quâ tegitur ille locus, Cutis pars rubra apparebit. Quo plura autem vascula obstructa sunt atque turgentia, eo major erit rubor. Auctâ tandem magis magisque fluidi stagnantis copiâ, in altum elevari ambientia ibi debent, ubi minor est resistentia, hinc *Tumor*. Quòd si verò quiescere diu atque stagnare in eodem loco cogitur Cruor, putrescere, motuque intestino agitari validè, vel alio modo corrumpi solet, ut inde *Inflammatio*, *Abscessus*, & omne *Tumorum* genus enasci possit, quorum tanta est diversitas, ut omnes recensendo species non  
modo



modo tadium crearem Lectori doctissimo, sed ipsa Dissertatio in magnum tandem excresceret volumen. Denique ipsam oriri *Gangrænam* posse atque *Sphacelum* ex dictis haud difficulter deducimus.

## PROPOSITIO XXI.

*Subita tandem Aëris mutatio, corporis commotio vel alteratio excessiva, & sanguinis nimia effusio, spiritus viresq; turbant vel consumunt subito, atque varias Lipothymiae species producant.*

Nervos, horumque liquidum & sensus & motus organum esse, neminem latere credimus. Quicquid verò consumere subito spiritus, vel ordinatum eorum motum impedire potest, id sensus motusque ablationis causa existit. Nervi suo liquore destituti adeo elastici, atque ad motum apti amplius non sunt: hinc neque adeo acutè, vel planè non sentiunt, neque motrices musculorum fibras irrigare ita possunt, ut motus naturales vividè peragere, suasque functiones exercere ritè queant. Motus Cordis fit debilis, languidus, Arteriae leniter adeo attolluntur, ut exiguus aliquis, vel nullus omnino sentiatur pulsus. Vires hinc pereunt, externa frigent, totum pallore corripitur corpus, tandemque humi concidit, & tunc *Lipothymiam* pati dicitur Homo, quæ pro majori vel minori causæ vehementiâ, varia quoque nomina accepit. Lenissima ejus species est *Lipothymia* sive *Eclypsis*, in quâ vires eousque prosteruntur, ut corpus sustineri amplius vix queat. Major gradus est *Leipopsychia*, quæ gravius jam hominem invadit, ita ut, licet sensus aliquo modo remaneant, corpus tamen frigesce, pulsus & respiratio languere admodum incipiant. Tertio succedit *Syncope*, sensus, motus atque caloris naturalis omnimoda ferè ablatio, cum sudore frigido, pulsuque vix perceptibili: Ultimo tandem gradus vocatur *Asphyxia*, in quo sensu atque motu destitutus Homo mortis imaginem refert.

## PROPOSITIO XXII.

*Cura Motus Sanguinis Circulatorii imminuti absolvitur. 1. Ablatione illius, quod imminuere motum illum potest. 2. Restitutione Sanguinis crassioris, ad debitam fluiditatem. 3. Revocatione elateris sive toni Vasculorum debilitatorum naturalis, ad premendum sive circulandum debitè sanguinem necessarii.*

Traditâ



Traditâ hucusque Morborum historiâ, quomodo tandem eos restitutione Motûs imminuti præcavere possimus, videntum nunc restat. Primum igitur quod attinet, id unice Medico curæ sit oportet, ut omnes suprà (*Prop. XVI.*) memoratas causas summo evitare studio possit. Alimenta viscida, pingua, dura, cruda exulent, usurpentur verò Cibi boni succi, tenues, acriusculi, spirituosi, Vinum generosum, parcâ tamen manu datum. In Aëre temperato vivendum, vicissitudines autem ejus atque mutationes crebræ fugiendæ. Tristitiam, terrorem, quantum fieri potest, avertat à se vel devitet Æger, sitque è contrario hilari semper animo. Moderatæ quoque commotiones, & varia exercitia corporis multum profunt. Interim omni studio in id incumbat Medicus, ut ipsam Sanguinis Massam ab eâ liberet dispositione, unde dictos Morbos originem trahere posse credit. Itaque si nimiam Sanguinis abundantiam maxime distendere vasa sciamus, Venesectione admodum necessariâ opem fere Ægro, eique sic insigne levamen conciliare possumus. Etenim minore redditâ sanguinis copiâ non solum resistentia ejus imminuitur, sed ipsorum quoque Vasorum elater restitui maximam partem potest. Si verò viscida Sanguinis constitutio peccet, tunc indicatur ejus correctio per diluentia, aperientia atque resolventia, per potûs aquosos, per salina acriuscula, volatilia. Denique, ut elater fibrarum atque vasorum, qui multum hætenus de suo vigore amiserat, debitus restituatur, usus spirituosorum, aromaticorum, nervinorum, variâ formâ exhibendorum, maximè convenit. Atque hæc de proposito Themate dicta p. t. sufficiant; addicti enim brevitatis studio supervaneum esse duximus, ad specialiora plurima transire, atque farraginem Remediorum citra necessitatem congerere. Faxit interea Deus Opt. Max.

ut omnia ad Sanctiss. Sui Nominis Gloriam,

Proximique commodum feliciter cedant!



## CARMINA VOTIVA.

### I.

**H**umor quid noceat nimius qui permeat artus,  
                     Non dicis. Rerum sed documenta docent.  
 Te lento stimulat tardans in sanguine motus,  
                     Quid noceat, docto differis ingenio.  
 Sicque probas medium quem trudit vena liquorem;  
                     Parcus, vel nimius motus it in vitium.  
 Quàm benè commonstras fructum, quem plena laborum  
                     Effert sedulitas, quæ tibi chara fuit.  
 Perge. Tuis studiis morborum pelle catervam;  
                     Sic clarum Medici nomen ad astra feres.

*Hisce Doctissimo Domino Candidato, olim Convictori suo  
 suavissimo, Amico æstimatissimo animitus gratulatur*

JOH. ROD. à WALDKIRCH, J. U. D.  
 & Pr. P. in Academ. Bernens.



### II.

**E**X imo cordis libuit, *Mejere*, precari,  
                     Ut Tu defunctum restituas *Patrum*.

*Pauca hæc cum perpetuo felicitatis voto gratulabundus  
 subscribere allubuit*

CLAUDIO PASSAVANT, Med. &  
 Chirurg. Doct.

### III.



III.

**D**Um scandis Cathedram Doctorum, chare, Virorum,  
 Cognate! & Medica differis arte sagax;  
 Doctrinam miror, paucis quæ crevit in annis,  
 Et vires animi, judiciumque ratum.  
 Ingenii pars magna Tui miratus acumen,  
 Ægris qui nosti ferre salutis opem.  
 Gratulor, inque Dei Laudes, precor, omnia cedant,  
 Et Patriæ pariant commoda mille Tuæ.  
 Commoda percipies, vitæ mansura per ævum,  
 Et fies Patriæ fama decusque Tuæ.

Paucula hæc Nobili, Clarissimo, Doctissimoque Dn. Can-  
 didato, Amico & Cognato omni amoris & obser-  
 vantiae cultu colendo apponere & apprecari voluit,  
 ut debuit.

JOH. MARTIN. à MEYENBURG,  
 S. R. J. Eques & Cursuum Public.  
 Præfectus.

IV.

**U**Nde honor iste Tibi venit? Laus unde profecta?  
 In promptu causa est: Musa Tibi alma favet:  
 Totque boni Authorum libri cum fruge voluti,  
 Fecerunt docti, nomina clara Viri.  
 Imprimis Medicam tractas feliciter Artem;  
 Præmia capturus non peritura brevi.  
 Det Deus, ut possis hac inservire paternis  
 Tectis, virtutes ut meruere Tuæ.

*Hæc gratulabundus & ex animo*

F. de MEYENBURG, Celsissimi  
 Principis Constantiensis Præfectus  
 Scaphusiae in Uhwisen.

**O** Mihi post ullos nunquàm memorande Sodalis!  
 Suscipe fraternâ carmina scripta manu;  
 Quamq; manus dederit dignam Pœonia laurum  
 Hanc honorare sinas qualiacunq; mea  
 Carmina. Doctiloquos reor observâsse Melampus,  
 Quos Basilea sinu semper amœna fovet:  
 Quantum lethiferis vacuum tibi sit cerebellum  
 Humoribus; quantus, cùm velis, esse queas!  
 Præclari generisq; , Patrisq; simillima proles  
 Cernitur; en quantus! semper amice Vale.

Sic properante Musâ triumphum ominatur  
 & gratulatur Amico suavissimo

BERNH. FRIDERICUS DACHS,  
 S. S. Theol. Stud.



VI.

**P**agina scripta docet docte , Doctissime MEJER,  
 Tu quantus fias hacce Machaonia.  
 Ac quantas Numen dotes contulerit in Te,  
 Orbi commonstras exhilarasque Tuos.  
 Pierides igitur decernant laurea ferta ;  
 Hæc Tibi sincere gratulor atque precor,  
 Ut sic proporro divus Deus ipse secundet  
 Conatus magnos ac Tibi prospere eant.

Suavissimo atq; Clarissimo D.D. J.M. Mejero amicitie æternum  
 conservande gratia hisce venerabundus applaudit.

JO. GODOFREDUS KUHNIIUS,  
 Francovilla-Bipontinus, S.S. Theol. St.

F I N I S.